

寒山子詩集

性空題



# 目 錄

序 言	.....	一
寒山詩	.....	一
寒山佚詩	.....	一六八
拾得詩	.....	一七三
拾得佚詩	.....	二〇二
附 錄	.....	二〇六

# 一 寒山詩

## (一) 【凡讀我詩者】

凡讀我詩者，心中須護淨。  
慳貪繼日廉，諂曲登時正。  
驅遣除惡業，歸依受真性。  
今日得佛身，急急如律令。





(二) 【重巖我卜居】

重巖我卜居，鳥道絕人迹。  
庭際何所有，白雲抱幽石。  
住茲凡幾年，屢見春冬易。  
寄語鐘鼎家，虛名定無益。

(三) 【可笑寒山道】

可笑寒山道，而無車馬蹤。  
聯溪難記曲，疊嶂不知重。  
泣露千般草，吟風一樣松。  
此時迷徑處，形問影何從。



(四) 【吾家好隱淪】

吾家好隱淪，居處絕囂塵。  
踐草成三徑，瞻雲作四鄰。  
助歌聲有鳥，問法語無人。  
今日娑婆樹，幾年爲一春？

(五) 【琴書須自隨】

琴書須自隨，祿位用何爲。  
投輦從賢婦，巾車有孝兒。  
風吹曝麥地，水溢沃魚池。  
常念鶴鷓鳥，安身在一枝。





(六) 【弟兄同五郡】

弟兄同五郡，父子本三州。  
欲驗飛鳧集，須旌白兔游。  
靈瓜夢裏受，神橘座中收。  
鄉國何迢遞，同魚寄水流。

(七) 【一爲書劍客】

一爲書劍客，三遇聖明君。  
東守文不賞，西征武不勳。  
學文兼學武，學武兼學文。  
今日既老矣，餘生不足云。



(八) 【莊子說送終】

莊子說送終，天地爲棺槨。  
吾歸此有時，唯須一番箔。  
死將喂青蠅，吊不勞白鶴。  
餓著首陽山，生廉死亦樂。

(九) 【人問寒山道】

人問寒山道，寒山路不通。  
夏天冰未釋，日出霧朦朧。  
似我何由屆，與君心不同。  
君心若似我，還得到其中。





寒山子詩集 · 寒山詩

(十) 【天生百尺樹】

天生百尺樹，翦作長條木。  
可惜棟梁材，拋之在幽谷。  
年多心尚勁，日久皮漸禿。  
識者取將來，猶堪柱馬屋。

(十一) 【驅馬度荒城】

驅馬度荒城，荒城動客情。  
高低舊雉堞，大小古墳塋。  
自振孤蓬影，長凝拱木聲。  
所嗟皆俗骨，仙史更無名。

寒山拾得圖





(十二) 【鸚鵡宅西國】

鸚鵡宅西國，虞羅捕得歸。  
美人朝夕弄，出入在庭幃。  
賜以金籠貯，扃哉損羽衣。  
不如鴻與鶴，飄颻入雲飛。

(十三) 【玉堂挂珠簾】

玉堂挂珠簾，中有嬋娟子。  
其貌勝神仙，容華若桃李。  
東家春霧合，西舍秋風起。  
更過三十年，還成甘蔗滓。



因循過時光，渾是癡肉醬。雖有一靈臺，如同客作漢。

（二四二）【常聞釋迦佛】

常聞釋迦佛，先受然燈記。然燈與釋迦，祇論前後智。前後體非殊，異中無有異。

一佛一切佛，心是如來地。

（二四二）【常聞國大臣】

常聞國大臣，朱紫簪纓祿。富貴百千般，貪榮不知辱。





奴馬滿宅舍，金銀盈帑屋。  
癡福暫時扶，埋頭作地獄。  
忽死萬事休，男女當頭哭。  
不知有禍殃，前路何疾速？  
家破冷颼颼，食無一粒粟。  
凍餓苦淒淒，良由不覺觸。

【二四三】上人心猛利

上人心猛利，一聞便知妙。  
中流心清淨，審思云甚要。



下士鈍暗癡，頑皮最難裂。直得血淋頭，始知自摧滅。  
看取開眼賊，鬧市集人決。死屍棄如塵，此時向誰說。  
男兒大丈夫，一刀兩段截。  
人面禽獸心，造作何時歇？

(二四四) 【我有六兄弟】

我有六兄弟，就中一個惡。  
打伊又不得，罵伊又不著。  
處處無柰何，耽財好淫殺。





寒山子詩集

寒山詩

一三〇

見好埋頭愛，貪心過羅刹。  
阿爺惡見伊，阿娘嫌不悅。  
昨被我捉得，惡罵恣情掣。  
趁向無人處，一一向伊說。  
汝今須改行，覆車須改轍。  
若也不信受，共汝惡合殺。  
汝受我調伏，我共汝覓活。  
學業攻爐冶，煉盡三山鐵。  
從此盡和同，如今過菩薩。  
至今靜恬恬，衆人皆贊說。

